



SLUŽBENE NOVINE TUZLANSKOG KANTONA

GODINA 15 • TUZLA, PETAK, 26. SEPTEMBAR 2008. GODINE • IZDANJE NA BOSANSKOM JEZIKU • BROJ 9

270

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 16. 9. 2008. godine, donosi

ZAKON

O IZMJENAMA I DOPUNAMA ZAKONA O DOPUNSKIM PRAVIMA BRANITELJA I ČLANOVA NJIHOVIH OBITELJI

Član 1.

U Zakonu o dopunskim pravima branitelja i članova njihovih obitelji ("Službene novine Tuzlanskog kantona", br. 3/07 i 4/08) u članu 26. iza stava (3) dodaje se novi stav (4) koji glasi:

"(4) Pojedinačni akt o dodjeli stana u vlasništvo donosi Vlada Kantona".

Član 2.

U članu 39. iza stava (1) dodaju se novi stavovi (2) i (3) koji glase:

"(2) Izuzetno, lica iz stava (1) ovog člana, sa prebivalištem u Brčko Distriktu Bosne i Hercegovine i u općinama: Bijeljina, Bratunac, Milići, Srebrenica, Ugljevik, Vlasenica, Zvornik, Doboje, Odžak i Modriča, koja nisu korisnici prava na invalidninu na osnovu Federalnog zakona, ostvaruju pravo na jednokratno novčano primanje u toku jedne kalendarske godine, ukoliko podnesu zahtjev nadležnom organu najbliže općine u Kantonu.

(3) Pravo iz stava (2) ovog člana može se koristiti sve dok se ista ne budu mogla ostvarivati po propisima koji važe na području njihovog prebivališta".

Stav (2) postaje stav (4).

Član 3.

Ovaj Zakon stupa na snagu danom objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON

Predsjednik

Skupštine Tuzlanskog kantona,

Skupština

mr. sci. Amir Fazlić, v.r.

Broj: 01-02-586-6/08
Tuzla, 16. 9. 2008. godine

271

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona", br. 7/97 i 3/99 i "Službene novine Tuzlanskog kantona", br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 24. 9. 2008. godine, donosi

ZAKON

O UNIVERZITETU U TUZLI

I. OPĆA ODREDBA

Član 1.

(Predmet zakona)

Ovim Zakonom uređuju se pitanja vezana za status javne ustanove Univerzitet u Tuzli (u daljem tekstu: Univerzitet).

II. OSNIVAČ, NAZIV, SJEDIŠTE, PRAVNI POLOŽAJ I OBILJEŽJA

Član 2.

(Osnivač)

Skupština Tuzlanskog kantona vrši prava i dužnosti osnivača Univerziteta, preuzete Zakonom o Univerzitetu u Tuzli ("Službene novine Tuzlanskog kantona", br. 13/99, 12/00, 2/02, 10/02, 11/03, 8/04, 6/05 i 10/06).

Član 3.

(Naziv)

(1) Naziv Univerziteta glasi: "Javna ustanova Univerzitet u Tuzli" - "Universitas studiorum Tuzlaensis"

(2) Skraćeni naziv glasi: "Univerzitet u Tuzli".

Član 4.

(Pravni status)

(1) Univerzitet je javna ustanova u državnoj svojini, sa svojstvom pravnog lica, koji svoju djelatnost obavlja kao javnu službu.

(2) U okviru registrovane djelatnosti Univerzitet ima sva prava i obaveze u pravnom prometu sa trećim licima.

Član 5.

(Sjedište)

Sjedište Univerziteta je u Tuzli, Ul. Dr. Tihomila Markovića, broj 1.

Član 6.
(Pečat, znak, žig i štambilj)

(1) Univerzitet ima pečat okruglog oblika prečnika 50 mm, sa sljedećim tekstom: "Bosna i Hercegovina - Federacija Bosne i Hercegovine-Tuzlanski kanton-Javna ustanova Univerzitet u Tuzli-Universitas studiorum Tuzlaensis", sa znakom Univerziteta u sredini pečata, ispisan latiničnim i ćirilničnim pismom.

(2) Univerzitet ima mali pečat, prečnika 25 mm, istog oblika i sadržaja kao i pečat iz stava (1) ovog člana.

(3) Univerzitet ima suhi žig za ovjeru diplome i drugih odgovarajućih dokumenata, sa oblikom, veličinom i sadržajem, iz stava (1) ovog člana.

(4) Univerzitet može imati znak, kao i druge simbole u skladu sa statutom.

(5) Bliže odredbe o broju pečata i načinu njihovog korištenja i čuvanja utvrđuju se općim aktom Univerziteta.

Član 7.
(Pečat organizacionih jedinica)

(1) Organizaciona jedinica Univerziteta ima pečat u skladu sa statutom Univerziteta.

(2) Pečat organizacione jedinice sadrži tekst pečata Univerziteta i naziv organizacione jedinice.

III. DJELATNOST

Član 8.
(Djelatnost)

(1) Djelatnost Univerziteta je:

- a) visoko obrazovanje;
- b) izdavanje knjiga;
- c) izdavanje časopisa i sličnih periodičnih izdanja;
- d) ostala izdavačka djelatnost;
- e) ispitivanje terena bušenjem i sondiranjem;
- f) studentski domovi;
- g) restorani;
- h) kantine;
- i) katering;
- j) ostale konsultantske usluge i izrada softwera;
- k) obrada podataka;
- l) izrada i upravljanje bazama podataka;
- m) istraživanje i eksperimentalni razvoj u tehničkim i tehnološkim naukama;
- n) istraživanje i eksperimentalni razvoj u prirodnim naukama;
- o) istraživanje i eksperimentalni razvoj u humanističkim naukama;
- p) istraživanje i eksperimentalni razvoj u društvenim naukama;
- q) ispitivanje tržišta i ispitivanje javnog mnijenja;
- r) ostali pravni poslovi;
- s) arhitektonske i inženjerske djelatnosti i tehničko savjetovanje;
- t) tehničko ispitivanje i analiza;
- u) obrazovanje odraslih i ostalo obrazovanje d.n.;
- v) djelatnost sportskih objekata i stadiona;
- w) ostale sportske djelatnosti;
- x) proizvodnja osnovnih farmaceutskih proizvoda;
- y) zdravstveno-preventivna praksa;
- z) umjetničko i književno stvaralaštvo i scenska umjetnost;
- aa) pružanje konsultantskih usluga u vezi sa računarskom opremom (hardwer);
- bb) poslovi i menadžment konsalting;
- cc) ostale rekreativne djelatnosti d.n.;
- dd) djelatnost organizacija za zbrinjavanje invalida.

(2) Sve navedene djelatnosti od b) do dd) moraju biti u funkciji obrazovanja i naučno-nastavne djelatnosti.

IV. IMOVINA

Član 9.
(Imovina Univerziteta)

Imovinu Univerziteta čine pokretne i nepokretne stvari, kao i novac i prava Univerziteta.

Član 10.
(Ovlaštenja i odgovornost)

(1) Univerzitet istupa u pravnom prometu samostalno, u okviru ovlaštenja utvrđenih zakonom.

(2) Za svoje obaveze Univerzitet odgovara svom svojom imovinom (potpuna odgovornost).

(3) Osnivač je supsidijarno odgovoran za obaveze Univerziteta.

Član 11.
(Višak prihoda)

(1) Višak prihoda nad rashodima Univerzitet koristi za unapređenje i razvoj djelatnosti zbog koje je osnovan.

(2) Ako Univerzitet stvori obaveze koje nisu nastale u skladu sa planiranim, Vlada Tuzlanskog kantona (u daljem tekstu: Vlada Kantona), odnosno senat Univerziteta, utvrđuju odgovornim članove upravnog odbora i rektora Univerziteta.

V. UNUTRAŠNJA ORGANIZACIJA UNIVERZITETA

Član 12
(Organizacione jedinice)

(1) U sastavu Univerziteta ustanovljavaju se organizacione jedinice.

(2) Prava, obaveze i odgovornosti, broj i naziv organizacione jedinice, ovlaštenja u pravnom prometu i druga pitanja odnosa Univerziteta i organizacione jedinice utvrđuju se ovim Zakonom i statutom.

(3) Organizacione jedinice upisuju se u sudski registar.

(4) Organizacione jedinice koje su organizovane na Univerzitetu su:

- a) Akademija dramskih umjetnosti;
- b) Edukacijsko-rehabilitacijski fakultet;
- c) Ekonomski fakultet;
- d) Filozofski fakultet;
- e) Medicinski fakultet;
- f) Rudarsko-geološko-građevinski fakultet;
- g) Tehnološki fakultet;
- h) Fakultet elektrotehnike;
- i) Mašinski fakultet;
- j) Prirodno-matematički fakultet;
- k) Pravni fakultet;
- l) Farmaceutski fakultet;
- m) Fakultet za tjelesni odgoj i sport, i
- n) Studentski centar.

(5) Univerzitet može ustanoviti i druge organizacione jedinice, u skladu sa zakonom.

(6) Odluku o osnivanju, statusnoj promjeni i prestanku organizacione jedinice Univerziteta, donosi upravni odbor dvotrećinskom većinom svih članova, na prijedlog senata, a na osnovu elaborata koji je usvojila Vlada Kantona.

Član 13.
(Ovlaštenja u pravnom prometu)

(1) Organizacione jedinice Univerziteta, imaju određena ovlaštenja u pravnom prometu, kao i poseban obračun rezultata poslovanja, u skladu sa statutom Univerziteta.

(2) U pravnom prometu sa trećim licima organizacione jedinice istupaju pod nazivom Univerziteta i svojim nazivom, u skladu sa statutom.

VI. ORGANI UNIVERZITETA

Član 14. (Organi Univerziteta)

- (1) Organi Univerziteta su: upravni odbor, senat i rektor.
- (2) Univerzitet može imati stručne i savjetodavne organe.
- (3) Organi iz stava (1) ovog člana mogu osnivati stručne komisije i druga savjetodavna i stručna tijela.

Član 15. (Upravni odbor)

- (1) Organ upravljanja Univerziteta je upravni odbor.
- (2) Upravni odbor Univerziteta ima devet članova, i to pet iz reda osnivača koje imenuje Vlada Kantona i četiri koja imenuje Senat Univerziteta.
- (3) Predsjednik upravnog odbora Univerziteta imenuje se iz reda osnivača.
- (4) Mandat članova upravnog odbora je četiri godine.
- (5) Članovi upravnog odbora se imenuju u javnoj i transparentnoj konkursnoj proceduri.
- (6) Vlada Kantona, na prijedlog Ministarstva obrazovanja, nauke, kulture i sporta (u daljem tekstu Ministarstvo) donosi akt kojim se bliže uređuju pitanja vezana za početak i način rada, prava i obaveze upravnog odbora.
- (7) Prije podnošenja prijedloga akta iz stava (6) ovog člana, Ministarstvo će sa senatom usaglasiti tekst prijedloga.

Član 16. (Izuzeci)

- (1) Rektor, prorektor, rukovodilac organizacione jedinice Univerziteta i članovi senata Univerziteta ne mogu biti članovi upravnog odbora Univerziteta.
- (2) Za člana upravnog odbora ne može biti imenovano lice u radnom odnosu u organima koji vrše nadzor nad provođenjem zakona iz oblasti visokog obrazovanja i nadzor nad zakonitošću rada visokoškolskih ustanova, direktor javne ustanove koju osniva Kanton, direktor kantonalnog vanbudžetskog fonda, kao ni druga lica u skladu sa zakonom i drugim propisima.

Član 17. (Razrješenje člana upravnog odbora)

- (1) Senat, odnosno Vlada Kantona mogu razriješiti člana upravnog odbora kojeg su imenovali i prije vremena na koje je imenovan u skladu sa zakonom i statutom.
- (2) Prijevremeno razrješenje člana upravnog odbora bliže se uređuje aktom Vlade Kantona i statutom Univerziteta.

Član 18. (Djelokrug poslova upravnog odbora)

- (1) Upravni odbor obavlja poslove utvrđene zakonom, aktom o osnivanju i statutom Univerziteta, a naročito:
 - a) daje mišljenje o statutu Univerziteta te donosi opći akt o unutrašnjoj organizaciji i sistematizaciji radnih mjesta i druge opće akte u skladu sa zakonom i statutom;
 - b) utvrđuje planove finansiranja i razvoja;
 - c) donosi godišnji program rada Univerziteta na prijedlog senata Univerziteta;

- d) donosi finansijski plan i usvaja godišnji obračun;
- e) usmjerava, kontrolira i ocjenjuje rad rektora, odnosno direktora u domenu finansijskog poslovanja;
- f) rješava pitanja odnosa sa osnivačem;
- g) odlučuje o korištenju sredstava za rad u skladu sa statutom;
- h) odgovara osnivaču za rezultate rada Univerziteta;
- i) odlučuje o prigovoru zaposlenika na odluke organa Univerziteta koji su u prvom stepenu odlučivali o pravima, obavezama i odgovornostima zaposlenika iz radnog odnosa;
- j) najmanje jedanput godišnje podnosi osnivaču izvještaj o poslovanju;
- k) obavlja i druge poslove u skladu sa zakonom, aktom o osnivanju i statutom.

(2) Nadležni organi su dužni obezbijediti upravnom odboru tražene i druge relevantne informacije i dokumentaciju vezanu za rad Univerziteta.

Član 19. (Naknada za rad članovima upravnog odbora)

Članovima upravnog odbora Univerziteta pripada naknada za rad u upravnom odboru u visini koju utvrđuje Vlada Kantona.

Član 20. (Rektor Univerziteta)

- (1) Organ rukovođenja Univerziteta je rektor, koji se bira u proceduri javnog konkursa.
- (2) Za rektora Univerziteta može biti izabran nastavnik u naučno-nastavnom zvanju redovnog profesora, koji ispunjava uslove za to zvanje na Univerzitetu.
- (3) Rektora Univerziteta bira i razrješava senat tajnim glasanjem na mandat od četiri godine i može biti ponovo izabran još jedan mandat.
- (4) Rektor se bira i razrješava u skladu sa uslovima i postupku propisanim zakonom i statutom.
- (5) Za rektora ne može biti izabrano lice koje ima funkciju u izvršnim organima političke partije ili organizacije koja je povezana sa političkom partijom, kao ni drugo lice utvrđeno statutom.

Član 21. (Vršilac dužnosti rektora)

Ako je pozicija rektora, prije isteka perioda na koji je izabran, ostala upražnjena iz ličnih i drugih razloga, senat Univerziteta iz svojih redova bira vršioca dužnosti rektora koji obavlja dužnost do izbora novog rektora, najdalje šest (6) mjeseci.

Član 22. (Ovlaštenja)

Rektor ne može bez prethodne saglasnosti upravnog odbora sklapati poslove o sticanju, opterećenju ili otuđenju imovine, kao ni raspolagati sredstvima preko iznosa utvrđenog statutom Univerziteta.

Član 23. (Djelokrug rektora)

- Rektor Univerziteta obavlja poslove utvrđene zakonom i statutom, a naročito:
- a) zastupa i predstavlja Univerzitet;
 - b) organizira i rukovodi radom Univerziteta i odgovoran je za zakonitost njegovog rada;

- c) predlaže opće akte i donosi pojedinačne akte u skladu sa zakonom i statutom;
- d) predlaže upravnom odboru i senatu mjere za unapređenje rada Univerziteta;
- e) predlaže upravnom odboru mjere za efikasno i zakonito obavljanje djelatnosti Univerziteta,
- f) predlaže upravnom odboru, senatu i osnivaču osnovne planova rada i razvoja Univerziteta,
- g) predlaže upravnom odboru unutrašnju organizaciju i sistematizaciju radnih mjesta;
- h) izvršava odluke upravnog odbora i drugih organa Univerziteta;
- i) odlučuje o korištenju sredstava do iznosa utvrđenog statutom Univerziteta;
- j) odlučuje o pravima, obavezama i odgovornostima zaposlenika iz radnog odnosa;
- k) podnosi upravnom odboru izvještaj o finansijskom poslovanju Univerziteta;
- l) naredbodavac je za izvršenje finansijskog plana;
- m) učestvuje u radu Rektorske konferencije Bosne i Hercegovine;
- n) obavlja i druge poslove u skladu sa zakonom, osnivačkim aktom i statutom Univerziteta.

Član 24.
(Odgovornost rektora)

(1) Rektor Univerziteta je odgovoran za zakonitost rada Univerziteta.

(2) Rektor Univerziteta za svoj rad u domenu akademskih pitanja odgovara senatu, a u domenu poslovanja upravnom odboru.

(3) Rektor jednom godišnje podnosi senatu i upravnom odboru izvještaj o svom radu.

Član 25.
(Razrješenje rektora Univerziteta)

(1) Pored slučajeva utvrđenih zakonom, rektor može biti razriješen dužnosti i prije isteka vremena na koji je imenovan u slučaju ozbiljnog kršenja odredbi statuta i drugih općih akata Univerziteta, kršenja zakona i drugih propisa, ako ostvaruje loše poslovne rezultate i ne izvršava zadatke predviđene zakonom, drugim propisom ili statutom ili ih izvršava protivno njima ili prekorači ovlaštenja, ako bude pravosnažno osuđen za krivično djelo, ako svojim ponašanjem povrijedi ugled i dužnost koju vrši, izgubi sposobnost obavljanja dužnosti rektora, zbog odsutnosti ili spriječenosti da u periodu dužem od tri mjeseca obavlja dužnost rektora i u dugim slučajevima predviđenim zakonom i statutom.

(2) Prijedlog za razrješenje rektora Univerziteta može dati Vlada Kantona, namanje tri nastavno-naučna, odnosno umjetničko-nastavna vijeća, ili nadpolovična većina članova upravnog odbora.

Član 26.
(Obustavljanje općeg i pojedinačnog akta)

(1) Rektor Univerziteta, dužan je da obustavi od izvršenja opći akt donesen na Univerzitetu koji nije u saglasnosti sa ustavom ili je u suprotnosti sa zakonom i drugim propisima, kao i izvršavanje pojedinačnog akta kojim se nanosi šteta Univerzitetu ili društvenoj zajednici i da o tome obavijesti Ministarstvo.

(2) Rektor je dužan upozoriti dekana i ostale rukovodioce na Univerzitetu na protivzakonitost ili protivstatutarnost njihovih planiranih ili donesenih odluka i o tome obavijestiti senat i nastavno-naučno odnosno umjetničko-nastavno vijeće organizacione jedinice.

Član 27.
(Prorektori)

(1) Rektor u radu pomažu prorektori, koje bira i razrješava senat tajnim glasanjem, nakon provedene procedure javnog konkursa.

(2) Broj, uslovi izbora i razrješenja i ovlaštenja prorektora bliže se uređuju statutom Univerziteta.

(3) Za prorektora ne može biti izabrano lice koje ima funkciju u izvršnim organima političke partije ili organizacije koja je povezana sa političkom partijom, kao ni drugo lice utvrđeno statutom.

Član 28.
(Senat Univerziteta)

(1) Senat je najviše izborno akademsko tijelo koje se bira u skladu sa statutom, na način kojim se osigurava zastupljenost svih naučno-nastavnih jedinica Univerziteta i različitih područja nauke i umjetnosti, kao i ostalih zaposlenih na Univerzitetu.

(2) Najmanje 15% članova senata su studenti iz svakog ciklusa koje bira studentski predstavnički organ.

(3) Senat uspostavlja tijela po naučnim grupacijama, i to: društvene nauke, humanističke nauke, prirodne nauke, tehničke nauke i biomedicina i zdravstvo. Broj predstavnika u senatu čini srazmjern broj članova iz svake naučne grupacije, što se bliže uređuje statutom Univerziteta.

Član 29.
(Nadležnost senata)

(1) Senat Univerziteta odlučuje o svim akademskim pitanjima, a posebno:

- a) o pitanjima nastavne, naučne, umjetničke i stručne djelatnosti Univerziteta;
- b) donosi statut, uz prethodno pribavljeno mišljenje upravnog odbora i saglasnost Vlade Kantona;
- c) donosi Etički kodeks, kojim se utvrđuju etička načela u visokom obrazovanju, objavljivanju naučnih rezultata, odnosu prema intelektualnoj svojini, odnosima između nastavnika i saradnika, drugih zaposlenih i studenata i druga pitanja;
- d) donosi opće akte u skladu sa zakonom i statutom;
- e) donosi nastavne planove i nastavne programe dodiplomskog, postdiplomskog i doktorskog studija;
- f) bira i razrješava rektora i prorektora Univerziteta;
- g) bira akademsko osoblje na prijedlog naučno-nastavnog vijeća, odnosno vijeća organizacione jedinice;
- h) imenuje komisije u postupku sticanja doktorata nauka na prijedlog naučno-nastavnog vijeća i odlučuje o izvještajima tih komisija;
- i) dodjeljuje počasno zvanje "profesor emeritus", te "počasni doktor nauka";
- j) podnosi prijedlog upravnom odboru za organiziranje i ukidanje fakulteta i drugih organizacionih jedinica Univerziteta;
- k) odobrava razvojne i organizacione planove;
- l) imenuje svoja stalna ili privremena tijela, radne grupe, komitete, grupe za praćenje kvaliteta rada i slično;
- m) propisuje odredbe kojima se regulira rad organa koja imenuje senat;
- n) utvrđuje upisnu politiku, u skladu sa potrebama tržišta rada, uz saglasnost Vlade Kantona;
- o) obavlja druge poslove u skladu sa zakonom i statutom.

(2) Senat Univerziteta odlučuje o akademskim pitanjima na prijedlog stručnih organa organizacionih jedinica kao i drugih organa i predstavničkih tijela studenata.

(3) Broj članova, sastav, način izbora i razrješenja i način rada senata utvrđuje se statutom Univerziteta.

VII. ORGANI ORGANIZACIONIH JEDINICA

Član 30.

(Organi fakulteta, akademije i visoke škole)

(1) Organi fakulteta, akademije i visoke škole kao organizacione jedinice Univerziteta su:

- a) naučno-nastavno, odnosno umjetničko-nastavno vijeće;
- b) dekan.

(2) Organizacione jedinice iz stava (1) ovog člana mogu imati i druge organe, što se uređuje statutom.

Član 31.

(Naučno-nastavno i umjetničko-nastavno vijeće)

(1) Naučno-nastavno, odnosno umjetničko-nastavno vijeće je akademsko tijelo kojeg čine nastavnici i saradnici koji su u radnom odnosu na Univerzitetu koji učestvuju u naučno-nastavnom procesu organizacione jedinice kao i studenti izabrani od studentskog predstavničkog organa, u skladu sa statutom Univerziteta.

- (2) Naučno-nastavno, odnosno umjetničko-nastavno vijeće:
 - a) predlaže nastavni plan i program za organizacionu jedinicu kao dio integralnog nastavnog plana i programa Univerziteta;
 - b) donosi odluke o akademskim, naučnim, umjetničkim i stručnim pitanjima na nivou organizacione jedinice;
 - c) obrazuje komisije u postupku sticanja naučnog stepena magistra i imenuje mentore i utvrđuje prijedlog komisije u postupku sticanja naučnog stepena doktora nauka i predlaže mentore;
 - d) bira i razrješava dekana, prodekana i predstavnike u senatu, tajnim glasanjem;
 - e) odlučuje o prigovorima studenata na odluku dekana o pojedinačnim pravima, obavezama i odgovornostima studenata;
 - f) obavlja i druge poslove u skladu sa zakonom i statutom Univerziteta.

Član 32.

(Dekan)

(1) Dekan organizuje i rukovodi radom i predstavlja i zastupa fakultet, akademiju i visoku školu kao organizacionu jedinicu Univerziteta, a posebno:

- a) saziva i predsjedava sjednicama naučno-nastavnog vijeća organizacione jedinice;
- b) predlaže rektoru unutrašnju organizaciju i sistematizaciju radnih mjesta organizacione jedinice;
- c) odlučuje u prvom stepenu o pojedinačnim pravima studenata;
- d) odlučuje i snosi odgovornost za korištenje sredstava kojima raspolaže organizaciona jedinica u skladu sa općim aktom Univerziteta;
- e) naredbodavac je za izvršenje finansijskog plana koji se odnosi na organizacionu jedinicu u skladu sa statutom;
- f) obavlja druge poslove utvrđene statutom Univerziteta.

(2) Dekan može raspolagati sredstvima organizacionih jedinica do iznosa utvrđenog statutom.

Član 33.

(Izbor dekana)

(1) Dekana bira i razrješava naučno-nastavno, odnosno umjetničko-nastavno vijeće Univerziteta.

(2) Za dekana može biti izabran nastavnik, izabran na Univerzitetu u naučno-nastavnom, odnosno umjetničko-nastavnom zvanju docent, vanredni profesor i redovni profesor.

(3) Dekan se bira na četiri godine po proceduri javnog konkursa i može biti ponovo izabran još jedan mandat.

(4) Uslovi i postupak izbora i razrješenja dekana bliže se uređuju statutom Univerziteta.

(5) Za dekana ne može biti izabrano lice koje ima funkciju u izvršnim organima političke partije ili organizacije koja je povezana sa političkom partijom, kao ni drugo lice utvrđeno statutom.

(6) Za vrijeme trajanja mandata dekan zasniva radni odnos na Univerzitetu sa punim radnim vremenom.

(7) Nastavnici koji u toku mandata stiču uslove za penziju ne mogu biti izabrani za dekana.

Član 34.

(Razrješenje dekana)

Dekan može biti razriješen prije isteka perioda na koji je izabran u slučajevima:

- a) ako ostvaruje loše poslovne rezultate,
- b) ako bude osuđen za krivično djelo,
- c) ako ne izvršava zadatke utvrđene zakonom, osnivačkim aktom i statutom ili ih izvršava protivno njima ili prekorači ovlaštenja,
- d) zbog odsutnosti ili spriječenosti da u periodu dužem od tri mjeseca obavlja dužnost dekana,
- e) ako svojim ponašanjem povrijedi ugled funkcije dekana,
- f) ako mu naučno-nastavno vijeće, odnosno umjetničko-nastavno vijeće iskaže nepovjerenje, tajnim izjašnjavanjem dvotrećinskom većinom.
- g) u drugim slučajevima utvrđenim zakonom i statutom.

Član 35.

(Prodekani)

(1) Dekanu u radu pomažu prodekani.

(2) Broj prodekana, uslovi i postupak izbora i razrješenja kao i njihova prava i obaveze utvrđuju se statutom.

Član 36.

(Organi drugih organizacionih jedinica)

(1) Institut kao naučno-istraživačka organizaciona jedinica ima stručno vijeće i direktora.

(2) Institut može imati i druge organe u skladu sa statutom.

(3) Druge organizacione jedinice Univerziteta, kao i njihove podorganizacione jedinice, imaju svoje organe u skladu sa statutom.

Član 37.

(Statut)

Pored odredbi utvrđenih zakonom, statut Univerziteta sadržava odredbe o stručnim i drugim organima organizacionih jedinica Univerziteta, postupku i uslovima njihovog obrazovanja i popunjavanja, sastavu, broju članova i nadležnosti tih organa.

VIII. FINANSIRANJE UNIVERZITETA

Član 38.

(Finansiranje Univerziteta)

(1) Univerzitet stiče sredstva za obavljanje svoje djelatnosti:

- a) iz sredstava osnivača;
- b) iz sredstava fondova;

- c) donacija, zavještanja i poklona;
- d) od vlastitih prihoda, u skladu sa zakonom i drugim propisima;
- e) iz drugih izvora u skladu sa zakonom.

(2) Sva novčana sredstva pripadaju Univerzitetu i troše se u skladu sa zakonom, podzakonskim aktom, statutom i usvojenim finansijskim planom.

(3) Organizaciona jedinica Univerziteta može sticati sredstva iz stava (1) ovog člana u skladu sa zakonom i statutom Univerziteta.

(4) Sredstva iz stava (1) ovog člana se iskazuju i evidentiraju u skladu sa trezorskim poslovanjem.

(5) Senat utvrđuje upisne kvote i donosi odluku o visini školarine, koju plaćaju studenti na Univerzitetu, uz prethodnu saglasnost Vlade Kantona.

Član 39. (Vlastiti prihodi)

(1) Vlastiti prihodi Univerziteta koji su kao takvi definisani posebnim propisima, raspodjeljuju se na način i u rokovima utvrđenim posebnim propisima, statutom i usvojenim finansijskim planom Univerziteta.

(2) Kriterije za raspored sredstava, koja Univerzitet ostvaruje iz vlastitih prihoda, na organizacione jedinice Univerziteta, donosi upravni odbor Univerziteta, uz pribavljeno mišljenje senata Univerziteta.

Član 40. (Interna kontrola i revizija)

Univerzitet uspostavlja internu kontrolu i internu reviziju poslovanja, u skladu sa zakonom.

IX. NADZOR

Član 41. (Nadzor)

(1) Nadzor nad provođenjem ovog zakona i propisa donesenih za njegovo provođenje vrši Ministarstvo.

(2) Nadzor se vrši na način koji ne narušava autonomiju Univerziteta i ne ometa njegov redovan rad.

X. PRELAZNE I ZAVRŠNE ODREDBE

Član 42. (Mandat članova upravnog odbora i nadzornog odbora)

(1) Vlada kantona i senat Univerziteta će imenovati upravni odbor Univerziteta u skladu sa ovim Zakonom, u roku od 90 dana od dana stupanja na snagu ovog Zakona.

(2) Mandat članovima upravnog odbora Univerziteta, zatečenih na dužnosti na dan stupanja na snagu ovog Zakona, traje do konstituisanja upravnog odbora imenovanog u skladu sa ovim Zakonom.

(3) Stupanjem na snagu ovog Zakona prestaje mandat članovima nadzornog odbora.

Član 43. (Mandat rektora i prorektora Univerziteta)

(1) Rektor i prorektori Univerziteta, te dekani i prodekani fakulteta izabrani prije stupanja na snagu ovog Zakona ostaju na istoj dužnosti do isteka mandata na koji su izabrani.

(2) Tekući mandat rektora i prorektora Univerziteta, te dekana i prodekana fakulteta broji se kao prvi mandat.

Član 44. (Rok za donošenje statuta)

(1) Senat Univerziteta će donijeti statut Univerziteta u roku od 30 dana od dana stupanja na snagu ovog Zakona.

(2) Univerzitet je dužan uskladiti svoju organizaciju, rad, opće akte i ugovore o radu sa odredbama Zakona o visokom obrazovanju ("Službene novine Tuzlanskog kantona", broj: 8/08), najkasnije u roku od devet mjeseci od dana stupanja na snagu Zakona o visokom obrazovanju.

Član 45. (Osnov za upis u sudski registar)

Ovaj Zakon predstavlja osnivački akt na osnovu kojeg će se izvršiti upis promjena u sudski registar ustanova.

Član 46. (Prestanak važnosti ranijih propisa)

Stupanjem na snagu ovog Zakona prestaje primjena Zakona o Univerzitetu u Tuzli "Službene novine Tuzlanskog kantona", br. 13/99, 12/00, 2/02, 10/02, 11/03, 8/04, 6/05 i 10/06).

Član 47. (Stupanje na snagu)

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON
Skupština
Broj: 01-02-490-13/08
Tuzla, 24. 9. 2008. godine

Predsjednik
Skupštine Tuzlanskog kantona,
mr. sci. Amir Fazlić, v.r.

272

Na osnovu člana 24. stav 1. tačka c) Ustava Tuzlanskog kantona ("Službene novine Tuzlansko-podrinjskog kantona" br. 7/97 i 3/99 i "Službene novine Tuzlanskog kantona" br. 13/99, 10/00, 14/02, 6/04 i 10/04) i člana 24. Zakona o budžetima u Federaciji Bosne i Hercegovine ("Službene novine Federacije Bosne i Hercegovine" br. 19/06), na prijedlog Vlade Tuzlanskog kantona, Skupština Tuzlanskog kantona, na sjednici održanoj 18. 7. 2008. godine, donosi

ODLUKU

o davanju saglasnosti na Izmjene i dopune Finansijskog plana Zavoda zdravstvenog osiguranja Tuzlanskog kantona za 2008. godinu

I.

Daje se saglasnost na Izmjene i dopune Finansijskog plana Zavoda zdravstvenog osiguranja Tuzlanskog kantona za 2008. godinu.

II.

Sastavni dio Izmjena i dopuna Finansijskog plana Zavoda zdravstvenog osiguranja su i Izmjene i dopune Operativnog programa zdravstvene zaštite i zdravstvenog osiguranja za 2008. godinu.